

摘藻堂四庫全書薈要

史部

欽定四庫全書薈要卷六千七百二十六 史部

明史卷一百三十三

大學士張廷玉等奉 勅修

列傳第二十二

廖永安

俞通海

弟通源
淵

胡大海

養子德濟
崇鳳

耿再成

張德勝

汪興祖

趙德勝

南昌康郎山
兩廟忠臣附

桑世傑

劉成

茅成

楊國興

胡深

孫興祖

曹良臣

周顯常

榮

濮

英

于

光等

張

耀

廖永安字彥敬德慶侯永忠兄也太祖初起永安兄弟
偕俞通海等以舟師自巢湖來歸太祖親往收其軍遂
以舟師攻元中丞曼濟哈雅於馬場河元人駕樓船不
利進退而永安輩操舟若飛再戰再破元兵始定渡江
策頃之發江口永安舉帆請所向命直指牛渚西北風
方驟頃刻達岸太祖揮常遇春先登采石鎮兵皆潰遂

乘勝取太平授管軍總管以舟師破曼濟哈雅水柵禽
陳兆先入集慶擢建康翼統軍元帥以舟師從取鎮江
克常州擢同僉江南行樞密院事又以舟師同常遇春
自銅陵趨池州合攻破其北門執徐壽輝守將遂克池
州偕俞通海拔江陰之石牌戍降張士誠守將藥瑞擢
同知樞密院事又以舟師破士誠兵於常熟之福山港
再破之通州之狼山獲其戰艦以歸遂從徐達復宜興
乘勝深入太湖遇吳將呂珍與戰後軍不繼舟膠淺被

執永安長水戰所至輒有功士誠愛其才勇欲降之不
可為所囚太祖壯永安不屈遙授行省平章政事封楚
國公永安被囚凡八年竟死於吳吳平喪還太祖迎祭
於郊洪武六年帝念天下大定諸功臣如永安及俞通
海張德勝耿再成胡大海趙德勝桑世傑皆已前沒猶
未有謚號乃下禮部定議議曰有元失馭四海靡沸英
傑之士或起義旅或保一方泯泯棼棼莫知所屬真人
奮興不期自至龍行而雲虎嘯而風若楚國公臣永安

等皆能罷之士膂力之才非陷堅沒陣即罹變捐軀義
與忠俱名耀天壤陛下混一天下追維舊勞爵祿及子
孫烝嘗著祀典易名定謚於禮為宜臣謹按謚法以赴
敵逢難謚臣永安武閔殺身克戎謚臣通海忠烈奉上
致果謚臣張德勝忠毅勝敵致強謚臣大海武莊關土
斥境武而克遂謚臣再成武壯折衝禦侮而有壯力謚
臣趙德勝武桓臣世傑業封永義侯與漢世祖封寇恂
景丹相類當即以為謚詔曰可九年皆加贈開國輔運

推誠宣力武臣光祿大夫柱國己又改封永安鄖國公
無子授其從子昇為指揮僉事

俞通海字碧泉其先濠人也父廷玉徙巢子三人通海
通源淵元末盜起汝潁廷玉父子與趙普勝廖永安等
結寨巢湖有水軍千艘數為廬州左君弼所窘遣通海
間道歸太祖太祖方駐師和陽謀渡江無舟楫通海至
大喜曰天贊我也親往撫其軍而趙普勝叛去元兵以
樓船扼馬場河等口瀕湖惟一港可通亦久涸會天大

雨水深丈餘乃引舟出江至和陽通海為人沉毅治軍
嚴而有恩士樂為用巢湖諸將皆長於水戰而通海為
最從破曼濟哈雅諸水寨授萬戶從渡江克采石取太
平徇下諸屬縣曼濟哈雅復以戰艦截采石而陳兆先
合淮兵二十萬屯方山相掎角通海與廖永安等擊之
大敗其衆曼濟哈雅遁進破兆先取集慶路從湯和拔
鎮江遷秦淮翼元帥偕諸將取丹陽金壇常州遷行樞
密院判官從克寧國下水陽因以舟師畧太湖降張士

誠守將於馬蹟山，舣舟胥口。呂珍暴至，諸將欲退兵通海。曰：「不可。彼衆我寡，退則情見，不如擊之。」乃身先疾鬪，矢下如雨。中右目，不能戰。命帳下士被已甲督戰，敵以爲通海也不敢逼。徐解去。由是一目遂眇。已偕永安等克石牌，戍奪馬馱沙而還。普勝既叛，歸友諒。陷池州，遣別將守而自據。樞陽水寨太祖方征浙東，以樞陽爲憂。通海往攻，大破之。普勝走盡，獲其舟，遂收復池州。遷僉樞密院事。陳友諒犯龍灣，偕諸將擊走之，追焚其舟於

慈湖禽七帥逐北至采石功最進樞密院同知從攻友諒下銅陵克九江掠蘄黃從徐達擊叛將祝宗康泰復南昌從援安豐敗士誠兵還攻廬州友諒大舉圍南昌從太祖擊之遇於康郎山舟小不能仰攻力戰幾不支通海乘風縱火焚其舟二十餘敵少挫太祖舟膠友諒駭將張定邊直前犯太祖舟常遇春射中定邊通海飛舸來援舟驟進水湧太祖舟得脫而通海舟復為敵巨艦所壓兵皆以頭抵艦兜鍪盡裂僅免明日復戰偕廖

永忠等以七舟置火藥焚敵舟數百踰二日復以六舟
深入敵連大艦力拒太祖登舵樓望久之無所見意已
沒有頃六舟繞敵艦出飄飄若游龍軍士謹譟勇氣百
倍戰益力友諒兵大敗師次左蠡通海進曰湖有淺舟
難回旋莫若入江據敵上流彼舟入即成禽矣遂移師
出湖水陸結柵友諒不敢出居湖中一月食盡引兵突
走竟敗死是役也通海功最多師還賜良田金帛明年
從平武昌拜中書省平章政事總兵畧劉家港進逼通

州敗士誠兵禽其將朱瓊陳勝進攝江淮行中書省事
鎮廬州從徐達平安豐又從克湖州畧太倉秋毫不犯
民大悅圍平江戰滅渡橋搗桃花塢中流矢創甚歸金
陵太祖幸其第問曰平章知予來問疾乎通海不能語
太祖揮涕而出翼日卒年三十八太祖臨哭甚哀從官
衛士皆感涕追封豫國公侑享太廟肖像功臣廟洪武
三年改封號國公諡忠烈通海父廷玉官僉樞密院事
先卒追封河間郡公通海無子弟通源嗣其官通源字

百川從大將軍征中原偕副將軍馮勝等會兵太原定河中渡河克鹿臺取鳳翔鞏昌涇州守開城會張良臣據慶陽再叛大將軍命諸將分兵蹙之通源自臨洮疾趨至涇畧其西顧時畧其北傅友德畧其東陳德畧其南大將軍逼城下良臣援絕糧盡敗死遂克慶陽征定西克興元皆先登洪武三年封南安侯歲祿千五百石予世券四年從廖永忠伐蜀又從徐達出塞撫甘肅有功徙江南豪民十四萬田鳳陽又攻雲南征廣南蠻俘

斬數萬二十二年詔還鄉賜鈔五萬置第於巢未行卒
子祖病不能嗣逾年追論胡黨以通源論死爵除通淵
以父兄故充參侍舍人從征積功授都督僉事通源既
坐黨太祖念通源通海功二十五年封淵越爲侯歲祿
二千五百石子世券帥師討建昌叛賊城越雋明年坐
累失侯遣還里建文元年召復爵隨大軍征燕戰沒於
白溝河次子靖嗣官

胡大海字通甫虹人長身鐵面智力過人太祖初起大

海走謁滁陽命為前鋒從渡江與諸將畧地以功授右翼統軍元帥宿衛帳下從破寧國副院判鄧愈戍之遂拔徽州畧定其境內元將楊完者以十萬衆來攻大海戰城下大破走之遂與鄧愈李文忠自昱嶺闕攻建德敗元帥於淳安遂克建德再敗楊完者降溪洞兵三萬人進樞密院判官克蘭溪從取婺州遷僉樞密院事下諸暨守將宵遁萬戶沈勝既降復叛大海擊敗之生禽四千餘人改諸暨為諸全州移兵攻紹興再破張士誠

兵太祖以寧越重地召太海使守之士誠將呂珍圍諸
全大海救之珍堰水灌城大海奪堰反灌珍營珍勢蹙
於馬上折矢誓請各解兵許之郎中王愷曰珍猾賊不
可信不如因擊之大海曰言出而背之不信既縱而擊
之不武師還人皆服其威信尋攻處州走元將舒穆魯
伊遜遂定處州七邑陳友諒寇龍灣命分軍擣信州以
牽制大海用王愷言親引兵往遂克信州以為廣信府
信方絕糧或勸還師大海曰此閩楚襟喉地也可棄之

乎築城浚隍以守之先是軍糧少所得郡縣將士皆徵糧於民名曰寨糧民甚病之大海以為言始命罷去進江南行省參知政事鎮金華初嚴州既下苗將蔣英劉震李福皆自桐廬來歸大海喜其驍勇留置麾下至是三人者謀作亂晨入分省署請大海觀弩於八詠樓大海出英遣其黨跪馬前詐訴英過大海未及答反顧英英出袖中槌擊大海中腦仆地并其子闕佐郎中王愷皆遇害英等大掠城中奔於吳其後李文忠攻杭州杭

人執英以降太祖命誅英刺其血以祭大海大海善用
兵每自誦曰吾武人不知書惟知三事而已不殺人不
掠婦女不焚毀廬舍以是軍行遠近爭附及死聞者無
不流涕又好士所至輒訪求豪雋劉基宋濂葉琛章溢
之見聘也大海實薦之追封越國公謚武莊肖像功臣
廟配享太廟初太祖克婺州禁釀酒大海子首犯之太
祖忽欲行法時大海方征越都事王愷請勿誅以安大
海心太祖曰寧可使大海叛我不可使我法不行竟手

刃之及闕住復被殺大海遂無後養子德濟字世美不知何許人大海帥以歸太祖從攻婺州為誘兵大破元兵於梅花門外禽其將李彌章由是知名既下信州太祖以德濟為行樞密院同僉使守之陳友諒將李明道來寇德濟與力戰大海來援夾擊之禽明道及其宣慰王漢二及大海為蔣英所害處州降將李祐之亦殺院判耿再成以叛張士誠聞浙東亂遣其弟士信寇諸全德濟自信州往救乘懈得入城與知州藥鳳院判謝再

興分門守夜半出敵不意歿士信營破走之擢浙江行
省參知政事移守新城士誠將李伯昇帥步騎大入寇
德濟固守乞師於李文忠文忠馳救德濟出兵夾擊大
破之詳文忠傳時德濟所部有潛移家入新城者文忠
疑德濟使然誅其都事羅彥敬欲微戒德濟將士皆怒
走告德濟德濟怡然曰右丞殺彥敬自為廣信作戰衣
有弊耳再言者斬於是太祖召德濟褒諭之而責文忠
失將士心且曰胡德濟之量汝不及也擢浙江行省右

丞賜駿馬未幾改左丞移鎮杭州從大將軍徐達出定西德濟軍失利達斬其部將數人械至京師帝念舊功釋之復以為都指揮使鎮陝西卒藥鳳高郵人知諸全有能聲方士信來攻與謝再興力守數出奇兵挫敵再興使部校鬻貨於杭太祖慮其輸我軍虛實召再興還而以參軍李夢庚總制諸全軍馬既而愈再興功為兄子文正娶其長女命徐達娶其幼女復遣守諸全再興愈夢庚出已上鳳復以細故繩之遂叛殺鳳鳳妻王氏

以身蔽鳳並殺之執夢庚降於士誠夢庚亦死之太祖
以再興數有功叛非其志故鳳與夢庚皆不得卹云

耿再成字德甫五河人從太祖於濠克泗滁州元兵圍
六合太祖救之與再成軍瓦梁壘力戰度不敵引還元
兵尾至太祖設伏澗側令再成誘敵大敗之以鎮撫從
渡江下集慶以元帥守鎮江以行樞密院判官守長興
再守揚州從取金華為前鋒屯縉雲之黃龍山以遏敵
衝與胡大海破舒穆魯伊遜於處州克其城守之伊遜

來攻又敗之慶元再成持軍嚴士卒出入民間蔬果無
所損金華苗帥蔣英等叛殺胡大海處州苗帥李祐之
等聞之亦作亂再成方對客飯聞變上馬收戰卒不滿
二十人迎賊罵曰賊奴國家何負汝乃反賊攢槊刺再
成再成揮劍連斫數槊中傷墜馬大罵不絕口死胡深
等收其屍藁葬之後改葬金陵聚寶山追封高陽郡公
侑享太平肖像功臣廟洪武三年加贈泗國公謚武壯
子天璧聞父難糾部曲殺賊比至李文忠已破賊斬之

遂以天壁守處州拒方國珍張士誠皆有功擢指揮副
使克浦城搗建寧走陳友定征襄陽進至西安招諭河
州臨洮皆下改杭州指揮同知七年出海捕倭深入外
洋溺死

張德勝字仁輔合肥人才畧雄邁與俞通海等以舟師
自巢來歸從渡江克采石太平陳頤森來攻與湯和等
破禽之授太平興國翼總管破曼濟哈雅水寨禽陳兆
先下集慶克鎮江授秦淮翼元帥取常州擢樞密院判

克寧國收長槍兵下太湖略馬蹟山攻宜興取馬馱沙
及石牌寨進僉樞密院事趙普勝陷池州德勝往援弗
及還從徐達拔宜興普勝復掠青陽石埭德勝與戰柵
江口破走之已復同通海擊敗其衆遂復池州引兵自
無為趨浮山走普勝將胡總管追敗之青山遂北至潛
山陳友諒將郭泰逆戰沙河破斬之遂克潛山友諒犯
龍灣德勝總舟師迎戰殺傷相當德勝大呼麾諸將奮
擊友諒軍披靡遂大敗與諸將追及之慈湖縱火焚其

舟至采石大戰沒於陣追封蔡國公諡忠毅肖像功臣
廟侑享太廟子宣幼養子興祖嗣職興祖巢人本汪姓
既嗣職從破安慶克江州拔蘄黃取南昌從援安豐大
敗張士誠兵鄱陽之戰與廖永安等以六舟深入又邀
擊友諒於涇江口功最擢湖廣行省參政從平武昌遂
克廬州略地至通州而還進大都督府僉事從徐達取
淮東下浙西進同知大都督府事大軍北征別將衛軍
由徐州克沂青東平乘勝至東阿降元參政陳瑋及所

部五萬餘人孔子五十六世孫衍聖公希學帥曲阜知縣希舉鄒縣主簿孟思諒等迎謁於軍門興祖禮之克東州縣聞風皆下遂取濟寧濟南洪武元年以都督兼右率府使從攻樂安克汴梁河洛還守濟寧與大將軍會師德州帥舟師並河進遂克元都徇下永平西取大同將三衛卒守之敗元兵斬獲無算時德勝之子宣己長命為宣武衛指揮同知而興祖復姓為汪三年進克武朔二州獲元知院馬廣等帥兵至大同北口大敗元

兵獲庫庫弟金剛弩等四百餘人未幾命為晉王武傅
兼山西行都督府同知四年從前將軍傅友德合兵伐
蜀克階文乘勝至五里關中飛石死蜀平詔都督興祖
歿於王事優賞其子迨封東勝侯予世券興祖子幼命
與宣同居以疾卒爵除

趙德勝濠人為元義兵長善馬槊每戰先登隸王孟格
麾下察其必敗太祖取滁陽德勝妻在軍中乃棄其妻
來從太祖喜賜之名為帳前先鋒取鐵佛岡從攻三汊

河破張家寨克全椒後河諸寨援六合中流矢幾殆擊
雞籠山搗烏江下和州含山襲陳額森營夜拔板門鐵
長官二寨遂取儀真授總管府先鋒從渡江下太平克
蕪湖句容溧水溧陽皆有功從常遇春敗曼濟哈雅於
采石破陳兆先營於方山下集慶功最從徐達取鎮江
破苗軍水寨下丹陽金壇平寧國轉領軍先鋒取廣德
破張士誠水寨復從遇春攻常州解牛塘圍復廣德寧
國取江陰攻常熟禽張士德從攻湖州宜興叛還兵定

之擢中翼左副元帥陳友諒犯龍灣龍江第一關曰虎
口城太祖以屬德勝友諒至力戰伏兵起友諒大敗遂
復太平下銅陵臨山寨畧黃山橋及馬馱沙征高郵有
功進後翼統軍元帥從太祖西征破安慶水寨乘風泝
小孤山距九江五里友諒始知倉皇遁去遂克九江徇
黃梅廣濟克瑞昌臨江吉安還下安慶進克撫州取新
淦討南昌叛將復其城礮傷肩授僉江南行樞密院事
與朱文正鄧愈共守南昌平羅友賢於池州破友諒將

於西山復臨江西安撫州未幾友諒大舉兵圍南昌德勝帥所部數千背城逆戰射殺其將敵大沮明日復合環城數匝友諒親督戰晝夜攻城且壞德勝帥諸將死戰且戰且築城壞復完暮坐城門樓指揮士卒弩中腰臂鏃入六寸拔出之歎曰吾自壯歲從軍傷矢石屢矣無重此者丈夫死不恨恨不能掃清中原耳言畢而絕年三十九追封梁國公謚武桓列祀功臣廟配享太廟德勝剛直沉鷙馭下嚴肅未嘗讀書臨機應變動合古

法平居篤孝友如修士友諒圍南昌八十五日先後戰死者凡十四人張子明者領兵千戶也洪都圍久由外闕潛出夜行晝止半月始得達太祖問友諒兵勢對曰兵雖盛戰鬪死者不少今江水日涸賊巨艦將不利援至可破也太祖謂子明歸語而帥堅守一月吾自取之還至湖口為友諒所獲令誘城中降子明佯諾至城下大呼我張大舍已見主上令諸公堅守救且至賊怒攢槊殺之追封忠節侯友諒攻撫州樞密院判李繼先乘

城戰死左翼元帥牛海龍突圍死左副元帥趙國旺引
兵燒戰艦敵追至投橋下死百戶徐明躍馬出射賊賊
知明名併力攻被執死軍士張德山夜半潛出城焚賊
舟賊覺死夏茂成守城樓中飛礮死右翼元帥同知朱
潛統軍元帥許珪俱戰死蔣必勝陷吉安參政劉齊知
府朱文華被執不屈死趙天麟守臨江友諒攻之城陷
不屈死祝宗康泰陷洪都知府葉琛與都事萬思誠迎
戰皆死贈爵立祠廟以德勝為首而康郎山戰死者三

十五人首丁普郎普郎初為陳友諒將守小孤山偕傅友德來降授行樞密院同知數有功及援南昌大戰鄱陽湖自辰至午普郎身被十餘創首脫猶直立執兵作鬪狀敵驚為神時七月己丑也迨贈濟陽郡公張志雄亦友諒將素驍勇號長張從趙普勝守安慶友諒殺普勝志雄怨來降為樞密院判至是舟檣折敵攢刺之知不能脫遂自刎元帥余昶右元帥陳弼徐公輔皆以其日戰沒先一日左副指揮韓成元帥宋貴陳兆先戰沒

韓成子觀至都督別有傳兆先者額森從子既被擒太祖以其兵備宿衛感帝大度効死力至是戰死越三日辛卯復大戰副元帥昌文貴左元帥李信王勝劉義死八月壬戌扼敵涇江口同知元帥李志高副使王咬住亦戰死其他偏裨死事者千戶姜潤王鳳顯石明王德朱鼎王清常德勝表華陳冲王喜仙汪澤丁宇史德勝裴軫王理王仁鎮撫常德鄭興遂德山羅世榮曹信凡贈公一人侯十二人伯二人子十五人男六人肖像

康郎山忠臣廟有司歲致祭又程國勝者徽人以義兵
元帥來歸敗楊完者累功至萬戶守南昌與牛海龍夜
刦友諒營海龍中流矢死國勝泅水得脫抵金陵從太
祖戰鄱陽張定邊直前犯太祖舟國勝與韓成陳兆先
駕舸左右奮擊太祖舟脫國勝等繞出敵艦後援絕力
戰死而南昌城中謂國勝已前死故豫章康山得廟俱
得預祀云

桑世傑無為人亦自巢湖來歸趙普勝有異志世傑發

其謀普勝逸去從渡江以舟師破元水軍授秦淮翼元
帥下鎮江徇金壇丹陽攻寧國長槍諸軍克水陽平常
州判行樞密院事畧地江陰宜興初石牌民朱定販鹽
無賴與富民趙氏有隙遂告變滅趙氏授江陰判官尋
復為盜元遣兵捕之定聞張士誠據高郵乃導士誠由
通州渡江遂陷平江以定為參政而遣元帥藥瑞戍石
牌及大兵既取江陰瑞尚據石牌導舟師往來太祖命
廖永安及世傑擊之世傑力戰死瑞亦降張氏窺江路

絕太祖念其功贈安遠大將軍輕車都尉永義侯侑享
太廟子敬以父死事累官都督府僉事洪武二十三年
封徽先伯歲祿千七百石子世券明年同徐輝祖等防
邊尋令屯軍平陽坐藍玉黨死又劉成者靈璧人以統
兵總管從耿炳文定長興為永興翼左副元帥數佐炳
文敗士誠兵李伯昇以十萬衆來攻城中兵僅七千太
祖遣兵援之未至炳文嬰城守成引數十騎出西門擊
敗伯昇兵禽其將宋元帥轉至東門敵悉兵圍之遂戰

死贈懷遠將軍立廟長興

茅成定遠人自和州從軍隸常遇春麾下克太平始授萬戶從定常州寧國進總管克衢州授副元帥守金華改太平興國翼元帥從克安慶援安豐戰鄱陽克武昌授武德衛千戶尋進指揮副使取贛州安陸襄陽泰州皆有功從徐達攻平江焚張士誠戰船築長圍困之達攻婁門士誠出兵戰成擊敗之突至外郭中又死贈東海郡公祀功臣廟同時死者有楊國興亦定遠人以右

翼元帥守宜興初常州人陳保二聚衆號黃包軍既降復叛誘執詹李二將國興執斬之授神武衛指揮使至是攻閭門戰死以其子益襲指揮使

胡深字仲淵處州龍泉人穎異有智畧通諸史百家之學元末兵亂嘆曰浙東地氣盡白禍將及矣乃集里中子弟自保舒穆魯伊遜以萬戶鎮處州辟參軍事募兵數千收捕諸山寇温州韓虎等殺主將叛深往諭之軍民感泣殺虎以城降已偕章溢討龍泉之亂搜旁縣盜

悉平之伊遜時已進行省參政承制命深為元帥戊戌十二月太祖親征婺州深帥兵車數百輛往援至松溪不能救敗去婺遂下明年耿再成侵處州伊遜分遣元帥葉琛參謀林彬祖鎮撫陳中真及深帥兵拒戰會胡大海兵至與再成合大破之進抵城下伊遜戰敗與葉琛章溢走建寧處州遂下深以龍泉慶元松陽遂昌四縣降太祖素知深名召見授左司員外郎遣還處州招集部曲從征江西既定命以親軍指揮守吉安處州苗

軍叛殺守將耿再成深從平章邵榮討誅之會改中書
分省為浙東行中書省遂以深為行省左右司郎中總
制處州軍民事時山寇竊發人情未固深募兵萬餘人
捕誅渠帥沿海軍素驍誅其尤橫者數人患遂息癸卯
九月諸全叛將謝再興以張士誠兵犯東陽左丞李文
忠令深引兵為前鋒再興敗走深建議以諸全為浙東
藩屏乃度地去諸全五十里並五指山築新城分兵戍
守太祖初聞再興叛急馳使詣文忠別為城守計至則

工已竣後士誠將李伯昇大舉來侵頓新城下不能拔
敗去太祖嘉深功賜以名馬太祖稱吳王以深為王府
參軍仍守處州温州豪周宗道聚衆據平陽數為方國
珍從子明善所偏以城來歸明善怒攻之深遣兵擊走
明善遂下瑞安進兵温州方氏懼請歲輸銀三萬充軍
實乃命深班師復還鎮陳友定兵至破之追至浦城又
敗其守兵城遂下進拔松溪獲其守將張子玉因請發
廣信撫州建昌三路兵規取八閩太祖喜曰子玉驍將

禽之則友定破膽乘勢攻之理無不克因命廣信指揮
朱亮祖由鉛山建昌左丞王溥由杉關會深齊進已亮
祖等克崇安進攻建寧友定將阮德柔固守深視氛祲
不利欲緩之亮祖曰師已至此庸可緩乎且天道幽遠
山澤之氣變態無常何足徵也時德柔兵屯錦江逼深
陣後亮祖督戰益急深引兵還擊破其二柵德柔軍力
戰友定自以銳師夾擊日已暮深突圍走馬蹶被執遂
遇害年五十二追封縉雲郡伯太祖嘗問宋濂曰胡深

何如人對曰文武才也太祖曰誠然浙東一障吾方賴之而深以久任鄉郡志圖平閩以報効竟以死徇深馭衆寬厚用兵十餘年未嘗妄戮一人守處州興學造士縉雲田稅重以新没入田租償其數鹽稅什一請半取之以通商賈軍民皆懷其惠云

孫興祖濠人從太祖渡江積功為都先鋒戰龍江遷統軍元帥破瑞昌八陣營擢天策衛指揮使興祖沉毅有謀大將軍徐達雅重之克泰州以達請命守海陵海陵

士誠兵入淮要地也興祖整軍令練士伍防禦甚嚴吳
兵自海口來侵擊敗之禽彭元帥平江既下命興祖取
通州士誠守將已詣徐達降進大都督府副使移鎮彭
城達既定關陝旋師北向檄興祖會東昌從克元都置
燕山六衛留兵三萬人命興祖以領大都督守分府事
大兵西征庫庫由居庸窺北平達謂諸將北平有孫都
督不足慮遂直搗太原語詳達傳洪武三年帥六衛卒
從達出塞次賽音布拉克川遇敵力戰死年三十五太



祖悼惜之追封燕山侯謚忠愍配享通州常遇春祠未
幾中書省以都督同知汪興祖兼俸事入奏帝聞奏興
祖名歎息命以月俸給故燕山侯興祖家以其長子恪
襲武德衛指揮使乂歷都督僉事二十有一年以右參
將從藍玉北征至捕魚兒海論功封全寧侯歲祿二千
石予世券恪謹敏有儒將風從征楚蜀還駐沔陽簡閱
各衛所軍士備邊二十五年進兼太子太保未幾籍兵
山西從宋國公勝練兵旋召還賜中書其後坐藍玉黨

死

曹良臣安豐人。潁寇起，聚鄉里築堡自固。歸太祖於應天，為江淮行省參政。從取淮東，收浙西，進行省左丞。從大軍取元都畧地，至澤潞，進山西。行省平章還守通州。時大兵出山西，通州守備單弱，所部不滿千人。元丞相伊蘇將萬騎營白河。良臣曰：「吾兵少，不可與戰。彼衆雖多，亡國之餘，敗氣不振，當以計走之。」乃密遣指揮仵勇等於瀕河舟中，多立赤幟，亘三十餘里。鉦鼓聲相聞。伊

蘇大駭遁去良臣出精騎追百餘里元兵自是不敢窺
北平復從大將軍徐達擊庫庫特穆爾於定西敗之洪
武三年封宣寧侯歲祿九百石予世券明年從伐蜀克
歸州山寨取容美諸土司會周德興拔茅岡覃垕寨自
白鹽山伐木開道出紙坊溪以趨夔州進克重慶明年
從副將軍李文忠北至臚朐河收其部落李文忠帥良
臣持二十日糧兼進至圖拉河哈喇章渡河拒戰少却
追至鄂爾坤河敵騎大集將士皆殊死戰敵大敗走而

良臣與指揮周顯常榮張耀皆戰死事聞贈良臣安國
公謚忠壯列祀功臣廟子泰襲侯坐藍玉黨死爵除顯
合肥人從渡江累功至指揮同知洪武三年以收應昌
紅羅山寨遷指揮使榮開平王遇春再從弟厯指揮僉
事遇春卒於軍榮護喪還從朱亮祖平蜀累官至振武
衛指揮同知耀壽州人初從陳頴森建康下始歸附累
功為守禦福建指揮使守興化至是俱戰沒帝厚卹諸
臣家命有司各表其墓

濮英廬州人初以勇力為百夫長積功至西安衛指揮
坐軍政不修召還詰責遣葉昇代之昇更言其賢令還
衛洪武十九年太祖命耿炳文選陝西都司衛所卒備
邊惟英所練稱勁旅加都督僉事其年命帥所部隨大
將軍馮勝北征抵金山降納克楚遂班師而以英將奇
兵三千人為殿納克楚餘衆竄匿者尚數十萬聞師旋
設伏於途謀俟大軍過竄取之未發英後至猝為所乘
衝突不能出馬路遂見執敵既得英思挾為質英絕食

不言乘間引佩刀剖腹死事聞贈金山侯謚忠襄明年
進贈樂浪公封其子璵西涼侯祿二千五百石並予世
券二十三年命練兵東昌又令駐臨清訓練士卒二十
五年召還同宋國公勝等簡閱山西士馬璵能修父職
帝甚嘉之復令籍山西民兵所籍州縣最多事集而不
擾明年坐藍玉黨戍五開死洪武中指揮使死事者又
有于光嚴德孫虎光都昌人初事徐壽輝鎮浮梁者友
諒弒壽輝光以浮梁來降授樞密院判積功為鷹揚衛

指揮鎮鞏昌庫庫圍蘭州光赴援至馬蘭灘戰敗被執
以徇城下光大呼曰公等但堅守今徐將軍大軍旦夕
至矣賊怒批其頰遂被殺祀功臣廟嚴德太平人從起
兵績功為海寧衛指揮從朱亮與方國珍力戰歿於台
州追封天水郡公孫虎不知何許人從援池州下於潛
昌化定建德諸全皆有功授千戶克新城桐廬進海寧
衛指揮使平嘉興盜從副將軍李文忠北征由東道入
應昌至落馬河與元兵戰死追封康安郡伯又指揮僉

事劉廣戌永平禦寇戰死涼州衛百戶劉林涼州戌也
森特穆爾叛戰死邊人壯之名其所居竇融臺為劉林
臺錢塘衛千戶袁興全椒人從征雲南自請為前鋒陷
陣死並褒贈有差

贊曰明祖之興決策渡江始力爭於東南計數千里之
內摧友諒滅士誠後然北定中原南圖閩粵則廖永安
胡大海以下諸人厥功豈細哉計不旋踵効命疆場雖
勛業未竟然褒崇廟祀竹帛爛然以視功成命爵終懼

奸黨者其猶幸也夫

明史卷一百三十三

欽定四庫全書

明史卷一百三十三考證

廖永安傳太祖揮常遇春先登

臣

章宗瀛按牛渚之

戰太祖援旗麾之常遇春應聲先登為明代開國第一功永安不過在行間耳舊本作急揮甲士鼓勇以登叙次尚未明晰宜作太祖揮常遇春先登謹改

廖永安傳永安被囚凡八年竟死於吳

臣

章宗瀛按

永安以元至正十八年戊戌十月被執迄至正二十

六年丙午卒於吳總計九年見朱國禎開國臣傳此
作八年互異謹附考

俞通海傳太祖方駐師和陽謀渡江無舟楫通海至大
喜曰天贊我也親往撫其軍

臣

章宗瀛按本紀元

至正十五年五月明太祖欲渡江無舟會巢湖師廖
永安俞通海等以水軍來附乃大喜往撫其衆據此
則是收而降之非攻拔之也舊本稱拔其軍未合擬
改撫字謹識

俞通海傳從克寧國下水陽

臣章宗瀛按江南江志

無水陽縣惟寧國路下有鎮名水陽實錄載至正丁酉取宣城通海與趙賊乘勝趣水陽下之當是當時屯兵地耳謹附考

俞淵傳

臣章宗瀛按俞淵洪武實錄作通淵考之開

國臣傳及王鴻緒明史稿皆同傳中獨稱俞淵不知何據謹識以闕疑

胡大海傳

臣章宗瀛按劉辰國初事蹟云太祖得嚴

州用義子保兒守之又載批示郭彥仁云保指揮我
之親男胡大海我之心腹前者聞二人不和必於我
男處丁寧說知將胡院判以真心待之節制以守之
據此則胡大海進樞密院判後嘗與保兒守嚴州矣
傳未載謹附識

胡大海傳陳友諒寇龍灣

臣章宗瀛按本紀元至正

二十年明祖令康茂才以書誘陳友諒速來於是友
諒至龍灣維時張德勝以舟師出龍江關為備禦則

是冠龍灣非龍江也舊本作江誤謹改

張德勝傳子興祖嗣職

臣章宗瀛按實錄興祖初襲

職改姓名曰張同至後復姓汪乃稱興祖傳未復載
謹附考

汪興祖傳與大將軍會師德州

臣章宗瀛按本紀北

伐之役徐達會諸將兵於臨清水陸並進於是常遇
春克德州合兵克通州考之徐常二傳亦同此云與
達會師德州與紀傳互異謹附考

汪興祖傳未幾命為晉王武傳兼山西行都督府同知
臣章宗瀛按實錄洪武三年六月以興祖為晉王
王武傳兼山西行都督府同知非僉事也舊本作僉
事誤謹改

趙德勝傳陳友諒犯龍灣龍江第一關曰虎口城

臣

章宗瀛按舊本作犯龍江應作龍灣謹畫一改下文
龍江乃關名本紀所稱命張德勝等以舟師出龍江
關是也應仍原文謹改識

韓成子觀至都督別有傳兆先者額森從子既被禽太祖以其兵脩宿衛感帝大度効死力至是戰死越三日辛卯復大戰

臣

章宗瀛按韓成子觀二句應即

叙於韓成戰沒之下文氣方貫且合傳文互見之體舊本書於兆先者二十九字之後既未一綫且與下越三日云云相隔僅移前一行又按其文已丑至辛卯中間只隔一日舊本作四日誤謹改

桑世傑傳太祖命廖永安及世傑擊之

臣

章宗瀛按

凡列傳之體一篇中如前已標其名則後可從省文
僅稱其名曰某此傳叙世傑事兼及廖永安前固未
見也應全舉姓名為是謹增後曹良臣傳中徐達增
徐字李文忠增李字俱仿此

贊云以視功成命爵終羅奸黨者其猶幸也夫

臣章

宗瀛按胡藍之獄當時雖不免連株然由於自取者
過半非東漢黨禍北宋黨籍可比舊本終羅黨籍四
字未為允協擬改黨籍作奸黨謹識



總校官編修臣吳紹濬

欽定四庫全書薈要

史部
明史卷一百三十六
四至



詳校官員外郎臣楊世綸

欽定四庫全書薈要卷六千七百二十七

史部

明史卷一百三十四

大學士張廷玉等奉 敕修

傳第二十二

何文輝

徐司馬

葉

旺

馬

雲

繆大亨

武德

蔡

遷

陳

文

王銘

甯

正

袁


義

金興旺

費子賢

花

茂



丁玉

郭雲

王

溥

何文輝字德明滁人太祖下滁州得文輝年十四撫為
己子賜姓朱氏太祖初起多蓄義子及長命偕諸將分
守諸路周舍守鎮江道舍守寧國馬兒守婺州柴舍真
童守處州金劉努守衢州皆義子也金劉努後無考周
舍即沐英軍中又呼沐舍柴舍者朱文劉與耿再成死
處州難人有朱文遜史不傳其小字亦以義子死太平
自沐英外最著者唯道舍馬兒馬兒即徐司馬而道舍

即文輝也文輝以天寧翼元帥守寧國進江西行省叅
政數攻江西未下州縣討新淦鄧仲廉斬之援安福走
饒鼎臣平山尖寨從徐達取淮東復從下平江賜文綺
進行省左丞復其姓以征南副將軍與平章胡美由江
西取福建度杉關入光澤徇邵武建陽直趨建寧元同
僉達爾瑪叅政陳子琦閉門拒守文輝與美環攻之踰
十日達爾瑪不能支夜潛至文輝營乞降詰旦總管翟
額森布哈亦以衆降於文輝美怒兩人不詣已欲屠其

城文輝馳告美曰與公同受命至此為安百姓耳今既降奈何以私忿殺人美乃止師入城秋毫無所犯汀泉諸州縣聞之皆相次歸附會車駕幸汴梁召文輝扈從因命為河南衛指揮使定汝州餘寇從大將軍取陝西留守潼關洪武三年授大都督府都督僉事予世襲指揮使復以叅將從傅友德等平蜀賜金幣留守成都文輝號令明肅軍民皆德之帝嘗稱其謀畧威望遷大都督府同知五年命帥山東兵從李文忠出應昌明年移

鎮北平文忠北征文輝督兵巡居庸關以疾召還九年
六月卒年三十六遣官營塋滁州東沙河上卹賚甚厚
子環成都護衛指揮使征迤北陣沒徐司馬字從政揚
州人元末兵亂年九歲無所依太祖得之養為子亦賜
姓既長出入侍左右及取婺州除總制助元帥常遇春
守婺吳元年授金華衛指揮同知洪武二年從副將軍
李文忠北征擒元宗王齊克慎擢杭州衛指揮使尋進
都指揮使詔復姓九年遷鎮河南時新建北京於汴梁

號重地帝素賢司馬特委任之宋國公馮勝方練兵河南會有星變占在大梁帝使使密敕勝且曰并以此語馬兒知之既復敕二人曰天象屢見大梁軍民錯處尤宜慎防今秦晉二王還京當嚴兵宿衛王抵汴時若宋國公出迓則都指揮居守都指揮出迓則宋國公亦然敕書官而不名倚重與宋公等十九年入覲遂擢中軍都督府僉事二十五年以左副總兵從藍玉征建昌討越嵩明年正月還至成都卒追坐藍玉黨二子皆獲罪

司馬好文學性謙厚所至撫循士卒甚得衆心在河南久尤有惠政公暇退居一室蕭然如寒素雖戰功不及文輝而雅量過之並稱賢將云

葉旺六安人與合肥人馬雲同隸長槍軍謝再興為千戶再興叛二人自拔歸數從征積功並授指揮僉事洪武四年偕鎮遼東初元主北走其遼陽行省叅政劉益屯益州與平章高嘉努相為聲援保金復等州帝遣斷事黃儔齎詔諭益益籍所部兵馬錢糧輿地之數來歸

乃立遼陽指揮使司以益為指揮同知未幾元平章洪保保馬彥翬合謀殺益右丞張良佐左丞商嵩擒彥翬殺之保保挾僞走納克楚營良佐因權衛事以狀聞且言遼東僻處海隅肘腋皆敵境平章高嘉努守遼陽山寨知院哈喇章屯瀋陽古城開元則右丞額森布哈金山則太尉納克楚彼此相依時謀入犯今保保逃往懣必起乞留斷事吳立鎮撫軍民而以所擒平章巴勒丹知院桑舒等送京師帝命立良佐嵩俱為益州衛指揮

僉事既念遼陽重地復設都指揮使司統轄諸衛以旺
及雲並為都指揮使往鎮之已知儔被殺納克楚將內
犯敕旺等預為備未幾納克楚果以衆至見備禦嚴不
敢攻越蓋至金州金州城未完指揮韋富王勝等督士
卒分守諸門轟喇固者敵驍將也率精騎數百挑戰城
下中伏弩仆為我兵所獲敵大沮富等縱兵擊敵引退
不敢由故道從蓋城南十里沿柞河遁旺先以兵扼柞
河自連雲島至庫圖勒寨十餘里緣河壘冰為牆沃以

水經宿凝亙如城布釘板沙中旁設坑竄伏兵以伺雲
及指揮周鶚吳立等建大旗城中嚴兵不動寂若無人
已寇至城南伏四起兩山旌旗蔽空矢石雨下納克楚
倉皇趨連雲島遇冰城旁走悉陷於竄遂大潰雲自城
中出合兵追擊至將軍山畢嚕河斬獲及凍死者無算
乘勝至珠爾峪納克楚僅以身免第功進旺雲俱都督
僉事時洪武八年也十二年命雲征大寧捷聞受賞召
還京後數年卒旺留鎮如故會高麗遣使致書及禮物

而龍州鄭白等請內附旺以聞帝謂人臣無外交此間
謀之漸勿輕信彼特示弱於我以窺邊釁還之使無所
藉口明年旺復送高麗使者周誼入京帝以其國中弑
逆又詭殺朝使反覆不可信切責旺等絕之而留誼不
遣十九年召旺為後軍都督府僉事居三月遼東有警
復命還鎮二十一年三月卒旺與雲之鎮遼也翦荆棘
立軍府撫輯軍民墾田萬餘頃遂為永利旺尤久先後
凡十七年遼人德之嘉靖初以二人有功於遼命有司

立祠春秋祀之

繆大亨定遠人初糾義兵為元攻濠不克元兵潰大亨獨以衆二萬人與張知院屯橫澗山固守月餘太祖以計夜襲其營破之大亨與子走免比明復收散卒列陣以待太祖遣其叔貞諭降之命將所部從征數有功擢元帥總兵取揚州克之降青軍元帥張鑑初鑑聚衆淮西以青布為號稱青軍又以善長槍稱長槍軍由舍山轉掠揚州元鎮南王博囉布哈招降之以為濠泗義兵

元帥踰年食盡謀擁王作亂王走死淮安鑑遂據城屠
居民以食大亨言於太祖曰賊方飢困若掠食四出則
難制矣且驍鷲可用無為他人得太祖乃命大亨亟攻
之鑑降得衆數萬馬二千餘匹悉送其將校妻子至應
天改淮海翼元帥府為江南分樞密院以大亨為同僉
樞密院事總制揚州鎮江大亨有治畧寬厚不擾而治
軍嚴肅禁暴除殘民甚悅之未幾卒太祖過鎮江歎曰
繆將軍生平端直未嘗有過惜不見矣遣使祭其墓武

德安豐人元至正中為義兵千戶知元將亡言於其帥
張鑑曰吾輩才雄萬夫今東劔西挫事勢可知不如早
擇所依鑑然其言相率歸太祖隸李文忠從赴池州力
戰流矢中右股拔去戰自若取於潛昌化克嚴州皆預
進萬戶苗帥楊完者軍烏龍嶺德請曰此可襲而取也
文忠問故對曰乘高覘之其部曲徙舉不安而聲囂文
忠曰善即襲完者覆其營取蘭溪克諸暨攻紹興皆先
登陷陣傷右臂不顧文忠歎曰將士人人如此何戰不

捷哉蔣英賀仁德之叛浙東大震從文忠定金華又從
攻處州遇仁德於劉山戈中右股德引刀斷戈追擊之
仁德再戰再敗走遂為其下所殺德還師守嚴後二年
定官制改管軍百戶從文忠破張士誠兵於諸暨與諸
將援浦城所過山寨皆下復從文忠下建延汀三州悉
定閩溪諸寨進管軍千戶移守衢予世襲最後從靖海
侯吳禎巡海上禎以德可任令守平陽在任八年致仕
及征雲南帝以德宿將命與諸大帥偕行張鑑又名明

鑑淮西人既歸太祖每攻伐必與德俱先德卒官至江
淮行樞密院副使

蔡遷不詳其鄉里元末從芝麻李據徐州李敗歸太祖
為先鋒從渡江下采石克太平取溧水破曼濟哈雅水
寨擒陳額森皆有功定集慶授千戶從徐達取廣德寧
國遷萬戶進攻常州獲黃元帥遂為都先鋒從征馬駝
沙克池州攻樞陽從征衢婺二州授帳前左翼元帥敗
陳友諒於龍灣進復太平取安慶水寨收九江敗友諒

八陣指揮於瑞昌遂克南昌從援安豐攻合肥戰鄆陽
從征武昌進指揮同知從常遇春討平鄧克明餘黨進
攻贛州取南安南雄諸郡還兵追饒鼎臣於茶陵遷龍
驤衛同知從徐達克高郵破馬港授武德衛指揮使守
淮安移守黃州從下湘潭辰全道永諸州轉荊州衛指
揮進克廣西遷廣西行省叅政兼靖江王相討平諸叛
蠻洪武三年九月卒詔歸葬京師贈安遠侯謚武襄遷
為將十五年未嘗獨任多從諸將征討身經數十戰輒

奮勇突出橫刀左右擊敵皆披靡不敢近既還金瘡滿
體人視之不可堪而遷畧不為意為太祖所愛重及卒
尤痛惜之親製文祭焉合肥陳文者南北征伐累立戰
功亦遷亞也文少孤奉母至孝元季挈家歸太祖積官
都督僉事卒追封東海侯謚孝勇明臣得謚孝者文一
人而已

王銘字子敬和州人初隸元帥俞通海麾下從攻曼濟
哈雅於采石以銘驍勇選充奇兵戰方合帥敢死士大

譟突之拔其水寨自是數有功與吳軍戰太湖流矢中
右臂引佩刀出其鏃復戰通海勞之復拔通州之黃橋
鵝項諸寨賜白金文綺龍灣之戰逐北至采石銘獨突
敵陣敵兵攢槊刺銘傷頰銘三出三入所殺傷過當賜
文綺銀碗選充宿衛從取江州戰康郎山及涇江口復
克英山諸寨擢管軍百戶從副將軍常遇春戰湖州之
弁山再戰舊館己又戰烏鎮前後數十戰功多命守松
江移太倉捕斬倭寇千餘人再賜金幣洪武四年都試

百戶諸善用槥者率莫能與銘抗累官至長淮衛指揮
僉事移守溫州上疏曰臣所領鎮外控島夷城池樓櫓
仍陋襲簡非獨不足壯國威猝有風潮之變捍禦無所
勢須改為帝報可於是繕城濬濠悉倍於舊加築外垣
起海神山屬郭公山首尾二千餘丈宏敞壯麗屹然東
浙巨鎮帝甚嘉之予世襲銘嘗請告暫還和州溫士女
遮道送迎長吏皆相顧歎曰吾屬為天子牧民民視吾
屬去來漠然愧王指揮多矣歷右軍都督僉事二十六

年坐藍玉黨死

甯正字正卿壽州人幼為韋德成養子冒韋姓元末隨德成來歸從渡江德成戰沒宣州以正領其衆積功授鳳翔衛指揮副使從定中原入元都招降元將士八千餘人傅友德自真定畧平定州以正守真定已從大軍取陝西馮勝克臨洮留正守之大軍圍慶陽正駐邠州絕敵聲援慶陽下還守臨洮從鄧愈破定西克河州洪武三年授河州衛指揮使上言西民轉粟餉軍甚勞而

茶布可易粟請以茶布給軍令自相貿易省輓運之苦
詔從之正初至衛城邑空虛勤於勞徠不數年河州遂
為樂土墾書嘉勞始復甯姓兼領寧夏衛事修築漢唐
舊渠引河水溉田開屯數萬頃兵食饒足十三年從沐
英北征擒元平章托和齊知院按珠取全寧四部十五
年遷四川都指揮使討平松茂諸州雲南初定命正與
馮誠共守之思倫發作亂正破之於摩沙勒寨斬首千
五百已敵衆大集團定邊沐英分兵三隊正將左軍鏐

戰大敗之語在英傳土酋阿資叛復從英討降之英卒
詔授正左都督代鎮已復命為平羌將軍總川陝兵討
平階文叛寇張者二十八年從秦王討平洮州番還京
明年卒又袁義廬江人本張姓德勝族弟也初為雙刀
趙總管守安慶敗趙同僉丁普郎於沙子港左君弼招
之弗從德勝戰死始來附為帳前親軍元帥賜姓名數
從征伐積功為興武衛指揮僉事從大將軍壯征敗元
平章溫普達等於通州走賀宗哲詹同於澤潞功最復

從定陝西敗元豫王兵與諸將合攻慶陽張良臣兵驟
薄義營義堅壁不為動俟其懈力擊破之走庫庫軍於
定西南取興元進本衛同知調羽林衛移鎮遼東已從
沐英征雲南克普定諸城留鎮楚雄蠻人屢叛義積糧
高壘且守且戰以功遷楚雄衛指揮使嘗入朝帝厚加
慰勞以其老命醫為染鬚鬢俾還任以威遠人且特賜
銀印寵異之歷二十年墾田築堰治城郭橋梁規畫甚
備軍民德之建文元年徵還為右軍都督府僉事進同

知卒官

金興旺不詳所始為威武衛指揮僉事進同知洪武元年大將軍徐達自河南至陝西請益兵守潼關以興旺副郭興守之進指揮使明年攻臨洮移興旺守鳳翔轉軍餉未幾賀宗哲攻鳳翔興旺與知府周煥嬰城守敵編荆為大箕形如半舫每箕五人負之攻城矢石不能入投藁焚之輒颺起乃置鉤藁中擲著其隙火遂熾敵棄箕走復為地道薄城城中以矛刺敵敵死甚衆而攻

不已興旺與煥謀曰彼謂我援師不至必不敢出乘其
不意擊之可敗也潛出西北門奮戰敵少却會百戶王
輅自臨洮收李思齊降卒東還即以其衆入城共守敵
拔營去衆欲追之輅曰未敗而退誘我也遣騎偵之至
五里坡伏果發還師復圍城衆議欲走興旺叱曰天子
以城畀我寧可去耶以輅所將皆新附慮生變乃括城
中貲畜積庭中令曰敵少緩當大犒新兵新兵喜協力
固守相持十五日敵聞慶陽下乃引去帝遣使以金綺

勞興旺等明年達入沔州遣興旺與張龍由鳳翔入連

雲棧合攻興元守將降以興旺守之擢大都督府僉事

蜀將吳友仁帥衆三萬寇興元興旺悉城中兵三千禦

敵面中流矢拔矢復戰斬數百人敵益衆乃斂兵入城

友仁決濠填塹為必克計達聞之令傅友德夜襲木槽

關攻斗山寨人持十炬連亘山上友仁驚遁興旺出兵

躡之隆崖石死者無算友仁自是氣奪時興旺威鎮隴

蜀而國初諸都督中城守功興旺外尤推費子賢子賢

亦不詳所始從渡江為廣德翼元帥數有功取武康又
取安吉築城守之張士誠兵數來犯輒敗去最後張左
丞以兵八萬來攻子賢所部僅三千人而守甚固設車
弩城上射殺其梟將二人敵乃解去以功進指揮同知
取福建克元都定西俱有功授大都督府僉事世指揮
使

花茂巢縣人初從陳頤森已而來歸從定江左滅陳友
諒平中原山西陝西積功授武昌衛副千戶征西蜀克

瞿唐關入重慶下左右兩江及田州進神策衛指揮僉
事調廣州左衛平陽春清遠英德翁源博羅諸山寨叛
蠻及東莞龍川諸縣亂民進指揮同知平電白歸善賊
再遷都指揮同知世襲指揮使數剿連州廣西湖廣諸
徭賊上言廣東南邊大海姦宄出沒東莞筍岡諸縣逋
逃蜚戶附居海島遇官軍則詭稱捕魚遇番賊則同為
寇盜飄忽不常難於訊詰不若籍以為兵庶便約束又
請設沿海依山廣海碣石神電等二十四衛所築城浚

池收集海島隱料無籍等軍仍於山海要害地立堡屯軍以備不虞皆報可進都指揮使久之卒賜葬安德門長子榮襲職次子英果毅有父風亦以軍功為廣東都指揮使有聲永樂中

丁玉初名國珍河中人仕韓林兒為御史才辨有時譽呂珍破安豐玉來歸隨征彭蠡為九江知府大兵還建康彭澤山民叛玉聚鄉兵討平之太祖嘉其武畧命兼指揮更名玉從傅友德克衡州以指揮同知鎮其地復

調守永州王有文武才撫輯新附威望甚著洪武元年
進都指揮使尋兼行省叅政鎮廣西十年召為右御史
大夫四川威茂土酋董貼里叛以王為平羌將軍討之
至威州貼里降承制設威州千戶所十二年平松州王
遣指揮高顯等城之請立軍衛帝謂松州山多田少耕
種不能贍軍守之非策王言松州為西羌要地軍衛不
可罷遂設官築戍如玉議會四川妖人彭普貴為亂焚
掠十四州縣指揮普亮等不能克命王移軍討滅之帝

手敕褒美轉左御史大夫師還拜大都督府左都督十三年坐胡惟庸姻誅

郭雲南陽人長八尺餘狀貌魁偉元季聚義兵保裕州白泉寨累官湖廣行省平章政事元主北奔河南郡縣皆下雲獨堅守大將軍徐達遣指揮曹諒圍之雲出戰被執大將軍呵之跪雲植立嫚罵求死脅以刃不動大將軍壯之繫送京師太祖奇其狀貌釋之時帝方閱漢書問識字否對曰識因以書授之雲誦其書甚習帝大

喜厚加賞賜用為漂水知縣有政聲帝益以為賢特擢
南陽衛指揮僉事使還鄉收故部曲就戍其地凡數年
卒長子洪年甫十三帝為下制曰雲出田間倡義旗保
鄉曲崎嶇累年竭心所事王師北伐人神響應而雲數
戰不屈勢窮援絕終無異志朕嘉其節概試之有司則
閭閻頌德俾鎮故鄉則軍民樂業雖無汗馬之勲倒戈
之效治績克著忠義凜然子洪可入開國功臣列授宣
武將軍飛熊衛親軍指揮使司僉事世襲其同時以降

將予世職者有王溥溥安仁人仕陳友諒為平章守建昌太祖命將攻之不克朱亮祖擊於饒之安仁港亦失利友諒將李明道之寇信州也溥弟漢二在軍俱為胡大海擒歸於行省李文忠文忠命二人招溥是歲太祖拔江州友諒走武昌溥乃遣使降命仍守建昌明年太祖次龍興帥其衆來見數慰勞從歸建康賜第聚寶門外號其街曰宰相街以寵異之尋遣取撫州及江西未附郡縣從克武昌進中書右丞洪武元年命兼詹事府

副詹事從大將軍北征屢有功賜文幣擢河南行省平章不署事歲祿視李伯昇潘元明初溥未仕時奉母葉氏避兵貴溪遇亂與母相失凡十八年嘗夢母若告以所在至是從容言於帝請歸省墳墓許之且命禮官具祭物溥率士卒之貴溪求不得晝夜號泣居人吳海言夫人為賊逼投井中死矣溥求得井有鼠自井出投溥懷中旋復入井汲井索之母屍在焉哀呼不自勝乃具棺斂即其地以葬溥卒子孫世襲指揮同知

贊曰文輝司馬任寄股肱葉旺馬雲效著邊域大亨以
端直見思郭雲以政績蒙寵他如蔡遷王銘甯正金興
旺輩或善戰或善守或善撫綏要皆一時良將也蓋明
運初興人材蔚起鐵券丹符之外其可稱者猶如此以
視詩人兔置之詠何多讓哉

明史卷一百三十四

欽定四庫全書

明史卷一百三十四考證

何文輝傳金剛努後無考

臣章宗瀛按金剛努雖無

可考或即當時色目人之散在江淮者是時明太祖
初起兵招維豪俊未必皆鄉曲舊人謹照例改譯而
識之

徐司馬傳及取婺州除總制助元帥常遇春守婺

臣

章宗瀛按明太祖本紀未載命遇春守婺事蓋其時

守之者胡大海也見本傳核之常遇春傳則云守婺
攻衢州考明師下婺州在元至正十八年十二月而
克衢即在次年九月或是暫守而後仍屬之大海耳
謹附考

徐司馬傳洪武二年從副將軍李文忠北征

臣章宗

瀛按洪武元年初定元都未嘗北征其擒宗王齊克
慎乃常遇春克開平之戰維時為洪武二年六月副
之者李文忠也見本紀及遇春傳此處作二年舊本

作元年誤謹改

張鑑傳

臣章宗瀛按張鑑又名張明鑑傳末既叙明

傳內或稱鑑前後參差不符殊非史體謹改從本名

以昭畫一

蔡遷傳破曼濟哈雅永寨擒陳額森皆有功

臣章宗

瀛按太平之戰陳額森被擒見本紀及張德勝傳舊

本及字當改擒字叙事方合謹改

蔡遷傳敗友諒八陣指揮於瑞昌

臣章宗瀛按孫興

祖傳載其為統軍元師時破瑞昌八陣營此云八陣
指揮卽其事也考是時友諒據有江西湖廣地故立
營瑞昌以防明兵舊本作壽昌係誤刊謹據興祖傳
改

花茂傳東莞筍岡諸縣

臣章宗瀛按廣東通志無筍

岡縣名考之明實錄亦不載茂疏惟洪武二十六年
廣東都指揮使有誅東莞寇何迪事稱迪伏衆海島
殺官軍或卽其所逋逃之地要之海島俗名非設縣

置鎮之處也諸縣二字當有誤但無可據訂謹仍原文而識之

明史卷一百三十四考證

欽定四庫全書薈要卷六千七百二十八 史部

明史卷一百三十五

大學士張廷玉等奉 敕修

列傳第二十二

陳 遇 秦從龍

葉 允

范 常 潘庭堅

宋思顏 夏 煜

郭景祥 李夢庚

王

濂

楊元杲

阮弘道

汪 河

孔克仁

陳遇字中行先世曹人高祖義甫宋翰林學士徙居建

康子孫因家焉遇天資沉粹篤學博覽精象數之學元

末為温州教授已而棄官歸隱學者稱為靜誠先生太

祖渡江以秦從龍薦發書聘之引伊呂諸葛為喻遇至

與語大悅遂留參密議日見親信太祖為吳王授供奉

司丞辭即皇帝位三授翰林學士皆辭乃賜肩輿一乘

衛士十人護出入以示榮寵洪武三年奉命至浙江廉

察民隱還賜金帛除中書左丞又辭明年召對華蓋殿

賜坐命草平西詔授禮部侍郎兼弘文館大學士復辭
西域進良馬遇引漢故事以諫除太常少卿固辭強之
不可最後除禮部尚書又固辭帝沉吟久之從之自是
不復強以官帝曾從容言欲官其子遇曰臣三子皆幼
學未成請俟異日帝亦弗強也遇自開基之始即侍帷
幄帝嘗問保國安民至計遇對以不嗜殺人薄斂任賢
復先王禮樂為首務廷臣或有過被譴責遇力為解多
得全釋其計籌多秘不傳而寵禮之隆勲戚大臣無與

比者每臨幸其宅語必稱先生或呼為君子命爵必辭
終成其高十七年卒賜葬鍾山子恭舉人累官工部尚
書有能名遇弟遠字中復嘗隨遇侍帝永樂初為翰林
待詔精繪事遠子孟顥善書秦從龍字元之洛陽人仕
元官江南行臺侍御史兵亂避居鎮江徐達之攻鎮江
也太祖謂之曰聞有秦元之者才器老成汝當詢訪致
吾欲見意達下鎮江訪得之太祖命從子文正甥李文
忠奉金綺造其門聘焉從龍與妻陳偕來太祖自迎之

於龍江時太祖居富民家因邀從龍與同處朝夕訪以時事已即元御史臺為府居從龍西華門外事無大小悉與之謀嘗以筆書漆簡問荅甚密左右皆不能知從龍生日太祖與世子厚有贈遺或親至其家燕飲至正二十五年冬從龍子澤死請告歸太祖出郊握手送之尋病卒年七十太祖驚悼明年督軍至鎮江親臨哭之厚卹其家命有司營葬

葉兌字良仲寧海人以經濟自負尤精天文地理卜筮

之書元末知天運有歸以布衣獻書太祖列一綱三目

言天下大計時太祖已定寧越規取張士誠方國珍而

察罕兵勢正盛遣使至金陵招太祖故允書于三者籌

之為詳其畧曰愚聞取天下者必有一定之規模韓信

初見漢高祖畫楚漢成敗孔明卧草廬與先主論三分

形勢是也今之規模宜北絕察罕南併張九四撫溫台

取閩越定都建康拓地江廣進則越兩淮以北征退則

畫長江而自守夫金陵古稱龍蟠虎踞帝王之都也籍

其兵力資財以攻則克以守則固百察罕能如吾何哉
江之所備莫急上流今義師已克江州足蔽全吳况自
滁和至廣陵皆吾所有匪直守江兼可守淮矣張氏傾
覆可坐而待淮東諸郡亦將來歸北畧中原李氏可并
也今聞察罕妄自尊大致書明公如曹操之招孫吳竊
以元運將終人心不屬而察罕欲效操所為事勢不侔
宜如魯肅計鼎足江東以觀天下之釁此其大綱也至
其目有三張九四之地南包杭紹北跨通泰而以平江

為巢穴今欲攻之莫若散言掩取杭紹湖秀而大兵直
擣平江城固難以即拔則以銷城法困之於城外矣石
不到之地別築長圍分命將卒四面立營屯田固守斷
其出入之路分兵畧定屬邑收其稅糧以贍軍中彼坐
守空城安得不困平江既下巢穴已傾杭越必歸餘郡
解體此上策也張氏重鎮在紹興紹興懸隔江海所以
數攻而不克者以彼糧道在三江斗門也若一軍攻平
江斷其糧道一軍攻杭州絕其援兵紹興必拔所攻在

蘇杭所取在紹興所謂多方以誤之者也紹興既拔杭
城勢孤湖秀風靡然後進攻平江犁其心腹江北餘孽
隨而瓦解此次計也方國珍狼子野心不可馴狎往者
大兵取婺州彼即奉書納款後遣夏煜陳顯道招諭彼
復狐疑不從顧使人從海道報元謂江東委之納款誘
令張晁齎詔而來且遣韓叔義為說客欲說明公奉詔
彼既降我而反欲招我降元其反覆狡獪如是宜興師
問罪然彼以水為命聞我兵至挈家航海中原步騎無

如之何夫上兵攻心彼言杭越一平即可納土不過欲款我師耳攻之之術宜限以日期責其歸順彼自方國璋之沒自知兵不可用又叔義還稱義師之盛氣已先挫今因陳顯道以自通正可協之而從也事宜速不宜緩宣諭之後更置官吏拘集舟楫潛收其兵權以消未然之變三郡可不勞而定福建本浙江一道兵脆城陋兩浙既平必圖歸附下之一辯士力耳如復稽遲則大兵自溫處入奇兵自海道入福州必不支福州下旁郡

迎刃解矣威名已震然後進取兩廣猶反掌也太祖竒其言欲留用之辭去賜銀幣繖衣後數歲削平天下規模次第畧如兌言

范常字子權滁人太祖軍滁杖策謁軍門太祖夙知其名與語意合置幕下有疑輒問常悉以實對諸將已克和州兵不戢常言於太祖曰得一城而使人肝腦塗地何以成大事太祖乃切責諸將搜軍中所掠婦女還其家民大悅太祖以四方割據戰爭無虛日命常為文禱

於上帝其辭曰今天下紛紜生民塗炭不有所屬物類盡矣倘元祚未終則羣雄當早伏其辜某亦在羣雄中請自某始若己厭元德有天命者宜歸之無使斯民久陷危苦存亡之機驗于三月太祖嘉其能達己意命典文牘授元帥府都事取太平命為知府諭之曰太平吾股肱郡其民數困于兵當令得所嘗以簡易為治興學恤民官廩有穀數千石請給民乏種者秋稔輸公公私皆足居三年民親愛之召入為侍儀洪武元年擢翰林

直學士兼太常司帝銳意稽古禮文羣臣集議間有異

同常能叅合衆言委曲當一意尋以病免歸歲餘手詔

徵詣闕仍故官帝宴閒輒命儒臣列坐賦詩為樂常每

先成語多率帝笑曰老范詩質朴殊似其為人也遷起

居注常有足疾數在告賜以安車尋乞歸帝賦詩四章

送之賜宅于太平子祖厯官雲南左叅政有修潔稱潘

庭堅字叔聞當塗人元末為富陽教諭謝去太祖駐太

平以陶安荐徵庭堅為帥府教授慎密謙約為太祖所

稱下集慶擢中書省博士婺州下改為寧越府以庭堅
同知府事時上游諸郡次第平定擇儒臣撫綏之先後
用陶安汪廣洋于江西而庭堅與王愷守浙東太祖為
吳王設翰林院與安同召為學士而庭堅已老遂告歸
洪武四年復召至主會試子黼字章甫有文名官至江
西按察使會修律令留為議律官書成卒黼謹飭類父
而文采清雅過之父子皆以鄉校顯時以為榮

宋思顏不知何許人太祖克太平以思顏居幕府及定

集慶置江南行中書省太祖摠省事以李善長及思顏
為叅議同時所設省中官李夢庚郭景祥侯元善楊元
杲陶安阮弘道孔克仁王愷藥鳳夏煜等數十人而思
顏獨與善長並授叅議其任較諸人為重已建大都督
府以思顏兼叅軍事太祖嘗視事東閣天暑汗沾衣左
右更以衣進皆數經浣濯者思顏曰主公躬行節儉真
可視法子孫惟願終始如一太祖嘉其直賜之幣他日
又進曰句容虎為害既捕獲宜除之今養民間何益

太祖欣然即命殺虎其隨事納忠類如此後出為河南道按察僉事坐事死夏煜字允中江陵人有俊才工詩辟為中書省博士婺州平調浙東分省兩使方國珍咸稱旨太祖征陳友諒儒臣惟劉基與煜侍都陽戰勝太祖所與草檄賦詩者煜其一也洪武元年使總制浙東諸府與高見賢楊憲凌說四人以伺察搏擊為事後俱以不良死

郭景祥濠人與鳳陽李夢庚皆從渡江典文書佐謀議

分任行中書省左右司郎中既同調浙東分省尋復同
入為大都督府叅軍景祥性諒直博涉書史遇事敢言
太祖親信之嘗曰景祥文吏而有折衝禦侮才能盡忠
於我可大任也先是克滁州太平漂陽以城郭不完輒
命景祥董治之既而和州守臣言州城久廢命景祥相
度即故址城之九旬而工畢太祖以為能授和州摠制
景祥益治城隍樓櫓廣屯田練士卒威望肅然和遂為
重鎮璽書褒勞仕終浙江行省叅政謝再興之守諸全

也部將私販易吳境太祖怒殺部將召諭再興命夢庚

往諸全摠制軍事再興還鎮忿夢庚出己上遂叛執夢

庚降于吳夢庚死之其時叅佐行省者又有毛騏王濂

濂字習古定遠人李善長婦兄也少好學事親孝初從

汝潁賊太祖克集慶乃渡江來歸善長為言得召見除

執法官讞獄平允遷中書省員外郎出為浙江按察僉

事治行著聞大風晝晦濂應詔言民瘼請緩征太祖納

之洪武三年卒帝謂善長曰濂有王佐才今死朕失一

臂後善長坐事帝歎曰使王濂在必不至是騏字國祥
與濂同里太祖自濠引兵趨定遠騏扶縣令出降太祖
喜留與飲食籌兵事悉當意取滁州擢提管府經歷典
倉廩兼掌晨昏厯稽將帥之失伍者從渡江擢行省郎
中是時太祖左右惟善長及騏文書機密皆兩人協贊
尋授叅議官征婺州命權理中書省事委以心膂俄病
卒太祖親為文哭之臨視其葬子驤管軍千戶積功擢
親軍指揮僉事從定中原進指揮使滕州段士雄反驤

討平之捕倭浙東斬獲多擢都督僉事見親任嘗掌錦衣衛事典詔獄後坐胡惟庸黨死

楊元杲阮弘道皆滁人家世皆儒者從渡江同為行省左右司員外郎與陶安等同番掌行機宜文字元杲以郎中擢理軍儲于金華而弘道亦于是歲以郎中從大都督文正守南昌皆有功而二人皆于太祖最故皆儒雅嗜文學練達政體而元杲知慮尤周密帝嘗曰文臣從渡江掌簿書文字勤勞十餘年無如楊元杲阮弘道

李夢庚侯元善樊景昭者其後元杲歷應天府尹弘道

歷福建江西行省叅政皆卒官元杲子貴博學強記以

詞翰知名薦授大名知縣仕至周府紀善元善全樹人

歷官叅知政事與樊景昭俱無所表見又汪河者舒城

人嘗師余闕以文章名從渡江為行中書省掾數陳時

務太祖高其才進大都督府都事使察罕議論稱旨後

奉命偕錢楨至河南報庫庫聘為所留太祖前後七致

庫庫書終不報洪武元年大軍下河洛庫庫走定西河

始得歸被拘凡六年帝甚嘉之進吏部侍郎脩陳西征
方畧二年改御史臺侍御史九年拜晉王左相親御便
殿諭遣之居數歲卒於官

孔克仁句容人由行省都事進郎中嘗偕宋濂侍太祖
太祖數與論天下大勢及前代興亡事陳友諒既滅太
祖志圖中原謂克仁曰元運既衰豪傑互爭其勢可乘
吾欲督兩淮江南諸郡之民及時耕種加以訓練兵農
兼資進取退守仍于兩淮間餽運可通之處儲糧以俟

兵食既足中原中圖卿以為何如克仁對曰積糧訓兵
觀釁待時此長策也當是時江左兵勢日盛太祖以漢
高自期嘗謂克仁曰秦政暴虐漢高帝起布衣以寬大
馭羣雄遂為天下主今英雄四起皆不知修法度以明
軍政此其所以無成也因感歎久之又曰天下用兵河
北有博羅特穆爾河南有庫庫特木爾關中有李思齊
張良弼然有兵而無紀律者河北也稍有紀律而兵不
振者河南也道途不道餽餉不繼者關中也江南則惟

我與張士誠耳士誠多奸謀尚間諜御衆無紀律我以
數十萬衆修軍政任將帥相時而動其勢有不足平者
克仁頓首曰主上神武當定天下于一矣嘗閱漢書濂
與克仁侍太祖曰漢治道不純者何克仁對曰王霸雜
故也太祖曰誰執其咎克仁曰責在高祖太祖曰高祖
創業遭秦滅學民憔悴甫蘓禮樂之事固所未諄孝文
為令主正當制禮作樂以復三代之舊乃遂巡未遑使
漢業終于如是帝王之道貴不違時三代之王有其時

而能為之漢文有其時而不為周世宗則無其時而為之者也又嘗問克仁漢高起徒步為天下主所操何道克仁對曰知人善任使太祖曰項羽南面稱孤仁義不施而自務功伐高祖知其然承以柔遜加以寬仁卒以勝之今豪傑非一我守江左任賢撫民以觀天下之變若徒與角力則猝難定也及徐達下淮東西又謂克仁曰昔壬辰之亂生民塗炭中原諸將博羅擁兵犯闕亂倫干紀行己夷滅庫庫挾太子以稱戈急私仇無敵愾

之志思齊等碌碌竊據一方民受其害士誠外假元名

反覆兩端明王珣父子據蜀僭號喜于自用而無遠謀

觀其所為皆不能有成子揆天時審人事有可定之機

今師西出襄樊東踰淮泗首尾相應擊之必勝大事可

成天下不難定既定之後生息猶難方勞思慮耳克仁

侍帷幄久故得獲聞太祖謀畧居多洪武二年四月命

克仁等授諸子經功臣子弟亦令入學己出知江州入

為叅議坐事死

贊曰太祖起布衣經營天下渡江以來規模宏遠聲教
風馳雖曰天授抑亦左右之弼多國士之助與陳遇見
禮不下劉基而超然利祿之外葉況于天下大計籌之
審矣亦能抗節肥遯其高致均非人所易及孔克仁無
可稱述以太祖之雄謀大畧具其事中故叙列于篇

明史卷一百三十五

欽定四庫全書

明史卷一百三十五考證

陳遇傳子恭舉人累官工部尚書

臣章宗瀛按七卿

表工部尚書無陳恭名攷雷禮列卿記恭以大理寺丞督易州山厰累加工部尚書蓋工部不過虛銜未嘗實理部事故表不載謹識

秦從龍傳尋病卒年七十太祖驚悼明年督軍至鎮江親臨哭之

臣章宗瀛按明太祖本紀元至正二十

六年正月自將救江陰旋即還未嘗有二十五年督
師鎮江之事舊本時方二字當作明年謹据本紀改
葉允傳時太祖已定寧越規取張士誠方國珍而察罕
兵勢甚盛遣使至金陵招太祖

臣章宗瀛按本紀

明太祖以元至正二十一年通使察罕次年六月察
罕始報書留使者不遣至十二月其子庫庫特穆爾
始以書歸使者未嘗有遣使相招事傳因元順帝是
年曾遣尚書張昶航海來招遂誤移於察罕耳謹附

考

范常傳洪武元年擢翰林直學士兼太常司

臣章宗

瀛按官志明太祖吳元年置太常司洪武三十年改司為寺建文中乃有太常卿少卿之名傳稱洪武元年則卿當作司舊本誤卿謹據改

潘庭望傳婺州下改為寧越府以庭堅同知府事

臣

章宗瀛按明太祖初定婺州改為寧越府後乃改金華庭堅知府事在初定時當稱寧越為是舊本作金

華誤謹改

潘黼傳父子皆以鄉校顯時以為榮

臣章宗瀛按潘

黼初授太平府學教授改金壇簿尋擢起居注從中書左司郎中吳元年除江西湖東道按察使此云父子皆以鄉校顯而不書黼之為教授記載未詳謹附考

明史卷一百三十五考證

欽定四庫全書薈要卷六千七百二十九

史部

明史卷一百三十六

大學士張廷玉等奉 敕修

列傳第二十四

陶安 錢用壬

詹同

朱升

崔亮 牛諒 權 張 答祿與 壽

朱夢炎
劉仲質

陶凱

曾魯

任昂

李原名

樂韶鳳

陶安字主敬當塗人少敏悟博涉經史尤長於易元至
正初舉浙江鄉試授明道書院山長避亂家居太祖取
太平安與耆儒李習率父老出迎太祖召與語安進曰
海內鼎沸豪傑並爭然其意在子女玉帛非有撥亂救
民安天下心明公渡江神武不殺人心悅服應天順人
以行弔伐天下不足平也太祖問曰吾欲取金陵何如
安曰金陵古帝王都取而有之撫形勝以臨四方何向

不克太祖曰善留叅幕府授左司員外郎以習為太平
知府習字伯羽年八十餘矣卒於官安從克集慶進郎
中及聘劉基宋濂章溢葉琛至太祖問安四人者何如
對曰謀畧不如基學問不如濂治民之才不如益與琛
太祖多其能讓黃州初下思得重臣鎮之無逾安者遂
命知黃州寬租省徭民以樂業坐事謫知桐城移知饒
州信州賊兵攻城安召吏民諭以順逆嬰城固守援兵
至敗去諸將欲盡戮民之從寇者安不可太祖賜詩褒

美州民建生祠事之吳元年初置翰林院首召安為學士時徵諸儒議禮命安為總裁官尋與李善長劉基周禎滕毅錢用壬等刪定律令洪武元年命知制誥兼修國史帝嘗御東閣與安及章溢等論前代興亡本末安言喪亂之源由於驕侈帝曰居高位者易驕處佚樂者易侈驕則善言不入而過不聞侈則善道不立而行不顧如此者未有不亡卿言甚當又論學術安曰道不明邪說害之也帝曰邪說害道猶美味之悅口美色之眩

目邪說不去則正道不興天下何從治安頰首曰陛下所言可謂深探其本矣安事帝十餘歲視諸儒最舊及官侍從寵愈渥御製門帖子賜之曰國朝謀畧無雙士翰苑文章第一家時人榮之御史或言安隱過常詰曰安寧有此且若何從知曰聞之道路帝大怒立黜之洪武元年四月江西行省叅政闕帝以命安諭之曰朕渡江卿首謁軍門敷陳王道及叅幕府裨益良多繼入翰林益聞讜論江西上游地撫綏莫如卿安辭帝不許至

任政績益著其年九月卒於官疾劇草上時務十二事
帝親為文以祭追封姑孰郡公子晟洪武中為浙江按
察使以貪賄誅其兄昱亦坐死發家屬四十餘人為軍
後死亡且盡所司復至晟家勾捕安繼妻陳詣闕訴帝
念安功除其籍初安之裁定諸禮也廣德錢用壬亦多
所論建用壬字成夫元南榜進士第一授翰林編修出
使張士誠留之授以官大軍下淮揚來歸累官御史臺
經歷預定律令尋與陶安等博議郊廟社稷諸儀其議

釋奠藉田皆援據經文及漢惠以來故事以定其制詔
報可語詳禮志洪武元年分建六部官拜用壬禮部尚
書凡禮儀祭祀宴享貢舉諸政皆專屬禮官又詔與儒
臣議定乘輿以下冠服諸式時儒生多習古義而用壬
考証尤詳確然其後諸典禮亦多有更定云其年十二
月請告歸

詹同字同文初名書婺源人幼穎異學士虞集見之曰
才子也以其弟槃女妻之至正中舉茂才異等除郴州

學正遇亂家黃州仕陳友諒為翰林學士承旨太祖下
武昌召為國子博士賜名同時功臣子弟教習內府諸
博士治一經不盡通貫同學識淹博講易春秋最善應
教為文才思泉湧一時莫與並遷考功郎中直起居注
會議袷禘禮同議當遂用之洪武元年與侍御史文原
吉起居注魏觀等循行天下訪求賢才還進翰林直學
士遷侍讀學士帝御下峻御史中丞劉基曰古者公卿
有罪盤水加劍詣請室自裁所以勵廉恥存國體也同

時侍側遂取戴記及賈誼疏以進復剴切言之帝嘗與
侍臣言聲色之害甚於鴆毒創業之君為子孫所承式
尤不可不謹同因舉成湯不邇聲色垂裕後昆以對其
因事納忠如此四年進吏部尚書六年兼學士承旨與
學士樂韶鳳定釋奠先師樂章又以渡江以來征討平
定之蹟禮樂治道之詳雖有紀載尚未成書請編日歷
帝從之命同與宋濂為總裁官吳伯宗等為纂修官七
年五月書成自起兵臨濠至洪武六年共一百卷同等

又言曰歷秘天府人不得見請訪唐貞觀政要分輯聖
政宣示天下帝從之乃分四十類凡五卷名曰皇明寶
訓嗣後凡有政蹟史官日記錄之隨類增入焉是年賜
敕致仕語極褒美未行帝復命與瀛議大祀分獻禮久
之起承旨卒同以文章結主知應制占對靡勿敏瞻帝
嘗言文章宜明白顯易通道術達時務無取浮薄同所
為多稱旨而操行尤耿介故至老眷注不衰子徽字資
善洪武十五年舉秀才官至太子少保兼吏部尚書有

才智剛決不可犯勤於治事為帝所獎任然性險刻李
善長之死徽有力焉藍玉下獄語連徽及子尚寶丞紱
並坐誅同從孫希原為中書舍人善大書宮殿城門題
額往往皆希原筆也

朱升字允升休寧人元末舉鄉薦為池州學正講授有
法蘄黃盜起棄官隱石門數避兵捕竄卒未嘗一日廢
學太祖下徽州以鄧愈薦召問時務對曰高築牆廣積
糧緩稱王太祖善之吳元年授侍講學士知制誥同修

國史以年老特免朝謁洪武元年進翰林學士定宗廟
時享齋戒之禮尋命與諸儒修女誡采古賢后妃事可
法者編上之大封功臣制詞多升撰時稱典核踰年請
老歸卒年七十二升自幼力學至老不倦尤邃經學所
作諸經旁注辭約義精學者稱楓林先生子同官禮部
侍郎坐事死

崔亮字宗明藁城人元浙江行省掾明師至舊館亮降
授中書省禮曹主事遷濟南知府以母憂歸洪武元年

冬禮部尚書錢用壬請告去起亮代之初亮居禮曹時
即位大祀諸禮皆其所條畫丞相善長上之朝由是知
名及為尚書一切禮制用壬先所議行者亮皆援引故
實以定其議考證詳確逾於用壬二年議上仁祖陵曰
英陵復請行祭告禮太常博士孫吾與以漢唐未有行
者駁之亮曰漢光武加先陵曰昌宋太祖亦加高祖陵
曰欽曾祖陵曰康祖陵曰定考陵曰安蓋創業之君尊
其祖考則亦尊崇其陵既尊其陵自應祭告禮固緣人

情而起者也廷議是亮頃之亮言禮運曰禮行於郊則百神受職今宜增天下神祇壇於圜丘之東方澤之西又言郊特牲器用陶匏周禮疏外祀用瓦今祭祀用瓷與古意合而槃盂之屬與古尚異宜皆易以瓷惟籩用竹又請大祀前七日陪祀官詣中書受誓戒戒辭如唐禮又依周禮定五祀及四時薦新裸禮圭瓚鬱鬯之制并言旗纛月朔望致祭煩而瀆宜止行於當祭之月皆允行帝嘗謂亮先賢有言見其生不忍見其死聞其聲

不忍食其肉今祭祀省牲於神壇甚通心殊未安亮乃奏考古省牲之儀遠神壇二百步帝大喜帝慮郊社諸祭壇而不屋或驟雨沾服亮引宋祥符九年南郊遇雨於太尉廳望祭及元經世大典壇垣內外建屋避風雨故事奏之遂詔建殿於壇南遇雨則望祭而靈星諸祠亦皆因亮言建壇屋焉時仁祖已配南北郊而郊祀禮成後復詣太廟恭謝亮言宜罷惟先祭三日詣太廟以配享告詔可帝以日中有黑子疑祭天不慎所致欲增

郊壇從祀之神亮執奏漢唐煩瀆不宜取法乃止帝一日問亮曰朕郊祀天地拜位正中而百官朝叅則班列東西何也亮對曰天子祭天升自午陞北向答陽之義也祭社升自子陞南向答陰之義也若羣臣朝叅當避君上之尊故升降皆由卯陞朝班分列東西以避馳道其義不同亮倉卒占對必傳經義多此類自郊廟祭祀外朝賀山呼百司箋奏上下冠服殿上坐墩諸儀及大射軍禮皆亮所酌定惟言大祀帝親省牲中祀小祀之

牲當遣官代帝命親祭者皆親省又請依唐制令郡國奏祥瑞帝以災異所係尤重命有司驛聞與亮議異三年九月卒於官其後牛諒達魯特與權張籌朱夢炎劉仲質之屬亦各有論建牛諒字士良東平人以洪武元年舉秀才為典簿與張以寧使安南還稱旨三遷至禮部尚書更定釋奠及大祀分獻禮與詹同等議省牲冠服御史達魯特與權請祀三皇太祖下其議禮官併命考歷代帝王有功德者廟祀之七年正月諒奏三皇立

廟京師春秋致祭漢唐以下就陵立廟帝為更定行之
詳禮志是年怠職降主事尋復官後仍以不任職罷諒
著述甚多為世傳誦達魯特與權字道夫蒙古人仕元
為河南北道廉訪使僉事入明寓河南永寧洪武六年
用薦授秦府紀善改御史請重刊律令盱眙民進瑞麥
與權請薦宗廟帝曰以瑞麥為朕德所致朕不敢當其
必歸之祖宗御史言是也明年出為廣西按察僉事未
行復為御史上書請祀三皇下禮官議遂并建帝王廟

且遣使者巡視歷代諸陵寢設守陵戶二人三年一祭其制皆由此始又請行禘禮議格不行改翰林修撰坐事降典籍尋進應奉十一年以年老致仕禘禮至嘉靖中始定張籌字惟中無錫人父翼嘗勸張士誠將莫天佑降復請於平章胡美勿僇降人城中人得完以詹同薦授翰林應奉改禮部主事奉詔與尚書陶凱編集漢唐以來藩王事蹟為昭鑑錄洪武九年由員外郎進尚書與學士宋濂定諸王妃喪服之制籌記誦淹博在禮

曹久諳於歷代禮文沿革然頗善附會初陶安等定圜丘方澤宗廟社稷諸儀行數年矣洪武九年籌為尚書乃更議合社稷為一壇罷勾龍棄配位奉仁祖配饗以明祖社尊而親之之道遂以社稷與郊廟祀並列上祀識者竊非之已出為湖廣叅政十年坐事罰輸作十二年仍起禮部員外郎後復官以事免朱夢炎字仲雅進賢人元進士為金谿丞太祖召居賓館命與熊鼎集古事為質直語教公卿子弟名曰公子書洪武十一年自

禮部侍郎進尚書帝方稽古右文夢炎援古証今剖析源流如指諸掌文章詳雅有根據帝甚重之卒於官劉仲質字文質分宜人洪武初以宜春訓導薦入京擢翰林典籍奉命校正春秋本末十五年拜禮部尚書命與儒臣定釋奠禮頒行天下學校每歲春秋仲月通祀孔子如儀時國子學新成帝將行釋菜侍臣有言孔子雖聖人臣也禮宜再奠再拜帝曰昔周太祖如孔子廟左右謂不宜拜周太祖曰孔子百世帝王師何敢不拜今

朕有天下敬禮百神於先師禮宜加崇乃命仲質詳議
仲質請帝服皮弁執圭詣先師位前再拜獻爵又再拜
退易服乃詣彝倫堂命講庶典禮隆重詔曰可又立學
規十二條命欽定九條頒賜師生已復奉命頒劉向說
苑新序於學校令生員講讀是年冬改華蓋殿大學士
帝為親製誥文坐事貶御史後以老致仕仲質為人厚
重篤實博通經史文體典確嘗當帝意焉

陶凱字中立臨海人領至正鄉薦除永豐教諭不就洪

武初以薦徵入同修元史書成授翰林應奉教習大本
堂授楚王經三年七月與崔亮並為禮部尚書各有敷
奏軍禮及品官墳塋之制凱議也其年亮卒凱獨任定
科舉式明年會試以凱充主考官取吳伯宗等百二十
人程文進御凱序其首簡遂為定例帝嘗諭凱曰事死
如事生朕養已不逮宜盡追遠之道凱以太廟已有常
祀乃請於乾清宮左別建奉先殿以奉神御明奉先殿
之制自此始五年凱言漢唐宋時皆有會要紀載時政

今起居注雖設其諸司所領諭旨及奏事簿籍宜依會
要編類為書庶可以垂法後世下臺省府者宜各置銅
櫃藏之以備稽考俾無遺闕從之明年二月出為湖廣
叅政致仕八年起為國子祭酒明年改晉王府左相凱
博學工詩文帝嘗厭前代樂章多諛辭或未雅馴命凱
與詹同更撰甚稱旨長至侍齋宮言宜有篇什以紀慶
成遂命凱首唱諸臣俱和而宋濂為之序其後扈行陪
祀有所獻帝輒稱善一時詔令封冊歌頌碑誌多出其

手云凱嘗自號耐久道人帝聞而惡之坐在禮部時朝使往高麗主客曹誤用符驗論死

曾魯字得之新淦人年七歲能暗誦五經一字不遺稍長博通古今凡數千年國體人才制度沿革無不能言者以文學聞於時元至正中魯帥里中豪集少壯保鄉曲數具牛酒為開陳順逆衆皆遵約束無敢為非義者人號其里曰君子鄉洪武初修元史召魯為修纂官吏成賜金帛以魯居首乞還山會編類禮書復留之時議

禮者蠡起魯衆中揚言曰某禮宜據某說則是從某說則非有辨詰者必歷舉傳記以告尋授禮部主事開平王常遇春薨高麗遣使來祭魯索其文視之外襲金龍黃帕文不署洪武年號魯讓曰龍帕誤耳納貢稱藩而不奉正朔於義何居使者謝過即令易去安南陳叔明篡立懼討遣使入貢以覲朝廷意主客曹已受其表魯取副封視之白尚書詰使者曰前王日熉今何驟更名使者不敢諱具言其實帝曰島夷乃狡獪如此耶卻其

貢由是器重魯五年二月帝問丞相魯何官對曰主事
耳即日起六階拜中順大夫禮部侍郎魯以順字犯其
父諱辭就朝請下階吏部持典制不之許成將捕獲倭
人帝命歸之儒臣草詔上閱魯藁大悅曰頃陶凱文已
起人意魯復如此文運其昌乎未幾命主京畿鄉試甘
露降鍾山羣臣以詩賦獻帝獨褒魯是年十二月引疾
歸道卒淳安徐尊生嘗曰南京有博學士二人以筆為
舌者宋景濂以舌為筆者曾得之也魯屬文不留藁其

徒間有所輯錄亦未成書云洪武中禮部侍郎二十餘人其知名者自曾魯外有劉崧秦約陳思道張衡數人崧自有傳約崇明人字文仲博學工辭章洪武初以文學舉召試慎獨箴約文第一立擢禮部侍郎母老乞歸已復召入陳三事皆切直仍乞歸卒思道山陰人字執中以進士授刑部主事帝賞其執法超拜兵部侍郎益勵風節人莫敢干以私改禮部乞歸居家不殖生產守令造門不得見久之卒衡事別載

任昂字伯顥河陰人元末舉進士除知寧晉縣不赴洪武初薦起為襄垣訓導擢御史十五年拜禮部尚書帝加意太學罷祭酒李敬吳顥命昂增定監規八條遂以曹國公李文忠大學士宋訥兼領國子監事會司諫闕賢上言邇來郡邑所司非人師道不立歲選士多缺甚至俊秀生員黥充承差乖朝廷育賢意昂乃奏定天下歲貢士從翰林院考試以為殿最明年命科舉與薦舉並行昂條上科場成式視前加詳取士制始定廣東都

指揮狄崇王臻以妾為繼室乞封下廷議昂持不可從之遂命昂及翰林院定嫡妾封贈例因詔偕吏部定文官封贈例十一應叙例五頒示中外尋請更定冤服之制及朝叅坐次又奏毀天下淫祠正祀典稱號蜀祀秦守李冰附以漢守文翁宋守張詠密縣祀太傅卓茂鈞州祀丞相黃霸彭澤祀丞相狄仁傑皆遺愛在民李龍遷祀於隆州謝夷甫祀於福州皆為民捍患吳丞相陸遜以勞定國宜祀於吳以子抗從子凱配元總管李黼

立祀江州元帥余闕立廟安慶皆以死勤事從闕守皖
全家殉義者有萬戶李宗可宜配享闕廟皆報可明年
命以鄉飲酒禮頒天下復令制大成樂器分頒學宮是
時以八事考課外吏及次第雲南功賞事不隸禮部帝
皆令昂主其議尋予告歸

李原名字資善安州人洪武十五年以通經儒士舉為
御史二十年使平緬歸言思倫發懷詐窺伺宜嚴邊備
靖江王以大理印行令旨非法為遠人所輕稱旨擢禮

部尚書自是遠方之事多咨之高麗奏遼東文高和定
州皆其國舊壤乞就鐵嶺屯戍原名言數州皆入元版
圖屬於遼高麗地以鴨綠江為界今鐵嶺已置衛不宜
復有陳請帝命諭其國守分土無生釁安南歲貢方物
帝念其勞民原名以帝意諭之令三年一貢自是為定
制又以帝命行養老政中明府州縣歲貢多寡之數定
官民巾服之式皆著為令初以達魯特與權言建歷代
帝王廟至是原名請以風后力牧等三十六人侑享帝

去趙普安圖阿珠而增陳平馮異潘美穆呼哩餘悉如
原名奏魯王薨定喪服之制進士王希曾請喪出母原
名謂非禮宜禁凡郊祀宗廟社稷瀆諸制先後儒臣
論定時有詳畧帝悉令原名更正之諸禮臣惟原名在
任久二十三年以老致仕

樂韶鳳字舜儀全椒人博學能文章謁太祖於和陽從
渡江叅軍事洪武三年授起居注數遷六年拜兵部尚
書與中書省御史臺都督府定教練軍士法改侍講學

士與承旨詹同正釋奠先師樂章編集大明日歷七年
帝以祭祀駕還應用樂舞前導命韶鳳等撰詞因撰神
降祥神貺惠酣酒色荒禽荒諸曲以進凡三十九章曰
回鑒樂歌皆寓規諫禮部具樂舞圖以上命太常肄習
之明年帝以舊韻出江左多失正命與廷臣參考中原
雅音正之書成名洪武正韻又命考陵寢朔望祭祀及
登壇脫舄諸禮儀皆詳稽故實俱從之尋病免未幾復
起為祭酒奉詔定皇太子與諸王往復書劄禮考據精

詳屢被褒答十三年致仕歸以壽終弟暉禮毅皆知名
贊曰明初之議禮也宋濂方家居諸儀率多陶安裁定
大祀禮專用安議其餘叅彙諸說從其所長袷禘用簠
同時享用朱升釋奠耕藉用錢用壬五祀用崔亮朝會
用劉基祝祭用魏觀軍禮用陶凱皆能援據經義酌古
準今郁然成一代休明之治雖折中斷制裁自上心諸
臣之功亦曷可少哉

明史卷一百三十六終

欽定四庫全書

明史卷一百三十六考證

陶安傳移知饒州信州賊兵攻城安召吏民論以順逆
嬰城固守援兵至敗去諸將欲盡戮民之從寇者安
不可舊本信州賊作陳友定

臣

章宗瀛按陳友定

攻饒州明實錄及本紀皆不載考是時友定據有八
閩僅一遣兵攻明處州為胡深所敗即閉境自守豈
能越浙攻饒核之開國臣傳則攻饒者乃信州賊蕭

明也據此方與下文民之從寇者相合謹改

陶安傳草上時務十二事

臣章宗瀛按明洪武實錄

作條上時務二十事與此互異至其所言何事則未之載謹附考

陶安傳廣德錢用壬亦多所論建用壬字成夫元南榜

進士第一

臣

章宗瀛按元史選舉志皇慶二年定

制蒙古色目人作一榜漢人南人作一榜故此別稱南榜進士謹附考

詹同傳乃分四十類凡五卷名曰皇明寶訓

臣章宗

瀛按明太祖寶訓藝文志作十五卷蓋其後史官續輯增多耳謹附考

朱升傳子同官禮部侍郎坐事死

臣章宗瀛按雷禮

列卿記王世貞卿貳表皆云同於洪武十六年坐事廢不言其死所坐何事亦未之載謹附考

崔亮傳字宗明

臣

章宗瀛按雷禮列卿記載亮字執

夫開國臣傳又稱亮字義夫俱與此互異謹附考

崔亮傳帝以日中有黑子疑祭天不慎所致

臣章宗

瀛按不慎舊本作不順係誤刊謹改

達魯特與權傳 達魯特舊本作答祿

臣章宗瀛按

與權柰曼部人先世有為戶者以勇稱元納延為之
賦射虎詩叙云即與權之曾祖又稱與權為至正初
進士由秘書兼管勾仕至河南北道廉訪使僉事見
元詩選王鴻緒明史稿所載略同但云蠻部人又云
先世有別號答祿者因以為氏則未解音譯而訛耳

今改正而附識之

張籌傳無錫人

臣

章宗瀛按浙江通志籌於元年末

浙江鄉試第一益元時浙江路隸常州行省也謹附
考

劉仲質傳十五年拜禮部尚書是年冬改華蓋殿大學
士 臣章宗瀛按洪武實錄是年十一月始倣宋殿
閣之制置大學士官同拜命者宋納吳伯宗吳沉與
質共四人謹附考

曾魯傳洪武初修元史召魯為修纂官

臣章宗瀛按

明太祖實錄洪武二年二月命修元史八月史成考
是時為總裁官者宋濂王禕魯與汪克寬胡瀚宋禧
陶凱陳基趙堦皆在分科修纂之例舊本作總裁官
謹當作修纂謹改

任昂傳文奏毀天下淫祠正祀典稱號

臣章宗瀛按

禮儀志所載祀典太祖時應天祀陳喬楊邦乂姚興

王鉞成都祀李冰文翁張詠均州祀黃霸密縣祀卓

茂松江祀陸遜陸抗陸凱龍州祀李龍建寧祀謝夷
甫彭澤祀狄仁傑九江祀李黼安慶祀余闕韓建之
李宗可較此傳多陳喬楊邦乂姚興王鉷韓建之五
人謹附考

樂韶鳳傳尋病免未幾復起為祭酒

臣

章宗瀛按雷

禮列卿記韶鳳以洪武九年起國子監司業十年三
月陞祭酒謹附考

明史卷一百三十六考證



總校官編修臣吳紹濬